


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 54 || No. 06

June, 2018



Editor: Rev. Stephen Chinzathang

Synod Kumpuon: **“Pasian thuguh kem”** (I Korin 4:1)

Khristian Tangkou

Vol. No. 54 || Issue No. 06 || June, 2018

Editorial Board

Editor : Rev. Stephen Chinzathang - 9863042789
ct_stephen@yahoo.com

Joint Editor : Rev. Khamchinkhai - 8730933744

Cir. Manager : Upa Jamsianmung - 9862086615
sianmung@rediffmail.com

Bus. Manager : Upa Kamgenpau - 8974612937
Shie T. Ginzahau - 8974438842

Cont. Editors : Upa Khupsuankham - 9856406454
Rev. Awnkhankhup - 9862828921
Rev. Dr. Hangpi Maunlun - 9862910875
Rev. Kaimuanlal - 9862923960

ZOU SYNOD ULIENTE

- **Moderator:**
Rev. Awnkhankhup
- **Moderator Elect:**
Rev. Dr. Hangpi Maunlun
- **Secretary (Sr):**
Upa Er. Thangchinmang
- **Secretary (Jr):**
Upa Liensuonkap
- **Treasurer:**
Upa Chinsuanthang
- **Statistician:**
Upa Khaihenthang
- **Executive Secretaries:**
Rev. Stephen Chinzathang
Rev. Khamchinkhai

A sung thu

- Editorial..... 01
- Thu tuomtuom 02
- Nang guolzawlina hiin 05
- Na Umdan leh Khrist Khantanhoi.. 07
- Delhi Hattuum Vena 09
- Numei hoi a pasal a dingin 12
- Presbyterian Hattuum 17
- Youth Corner 19
- Suunna..... 21
- ZPWF Cumlumn 23

Copies - 1100

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



Editorial

Tamtan chieng a aguolzawlina thupitah toh kumkim tan hing puitu I Mangpa Jesu Khrist min toh Hattuumte chibai.

Synod kumpuon: Tuachin min koute pen Khrist nasemte leh Pasian thuguh kemte bangin hing ngai tua uheh. Tam Bible tang poimaw tah igen zual ut hi.

1. Koute pen Khrist nasemte: Koite ahia Khrist nasemte Paul in amizie, agamatat zie, aumdan, a khohei dan, a hamkam zousie mi et a Khrist nasemte ahi ding uh a dei pen hiding a Korinth mite a hanthawn hiding ahi. Aziehpén Khrist nasemten, Korinth Hattuum sung leh khopi sung a abuoina tangpité uh, kikhenthangna, kitenna, kithoina sanéh, Hagau sil pieh tungtang Mangpa nitah ann nehdañ leh mishi thawkiana thute bang ahia, bang abuoina lah apat a Khrist nasemte banga kilat dan uh Paul in a etton ding ua a dei pen ahi.

2. Thuguh kemte: Thuguh kem ichi chieng in khovel vai ah, CID Govt. of India a tuomtuom a anei a, dept. tamtah in a khen ua, i gam sung a sem pawl gamdang a sem pawl bang a um ding tua mipen- I gam kumpi sih leh tang a mawpuo ahi uhi. Gamsung Khantouna ding bang venbitna ding bang a poimaw mama ahi. Tua a umte uh sepsuo ding apoimaw mama hi. Tuaziehin ei - gingtute ding thuguh kep apoimaw a, thuguh kem chi a mawh toupi ding hilou hi. A poimaw pen gingtuten Pasian gam a gin umtah a asep ding sum leh pai chauh hiloua, athu leh laa gen leh a dangdang a mi nuomtah - migintat, mi

muontah hiding thuguh kem chia a mawhtoupi ding ahisih a, Pasion nna mi etton thei ding a sep ding a poimaw hi.

Thuzawna: Pasion nasepna ah gingtuten dinmun poimawtah ama sepban sem dingin mawpuohna inei ua, tua sem ding a ngansie ihi bang in ginumtah a Pasion gam na sepna ah kukal tah a kikem siengthou leh muonhuoi ding in tami tungtawn ah ikihanthawn uhi. Simtu zousie Pasion in hing mapuita hen.

.....

Thy tuomtuom
leh
Thumpi dingte



1. **Laymen Basic Theological School Graduation Service:** Pasion hoina leh mapuina muongkawm in dated 15th May, 2018 niin Zou Synod Office ah Laymen Basic Theological Training School 1st Batch 2017-2018 sung a zilte Certificate hawmna leh Graduation Service kineipi hi. Tam hun ah 1st Batch a zousate leh 2nd Batch a ding a minkhumte pangkim uhi.
2. **Zou Synod Pastor Camp:** Pasion mapuina leh a khuthat a kepbitna muongkawm in ang tung ding June 5-7, 2018 sung PASTOR CAMP um ding hi. Ahun, ani leh Resource personte a din thumsah vaui. Pasion hagau pawlna toh zah leh man ahitheina dingin zong thumpi vaui. Resource Persons: Rev. Langdawngliana, leh Rev. Kamchinkhup D.S. Imphal EBCC.
3. **Synod Laymen Theological School 2nd Batch 2018-2019:** Pasion kithuopina muongkawm in Laymen Theological School 2nd Batch kipankiata hi. Lecturer dingtam anei a te Committee in apahsah ahi uh Thumna toh bawzui chiet va ui.

Lecturer**Subject**

1. Rev. Thangboi Khongsai - Old Testament
 2. Rev. Khamchinkhai - New Testament
 3. Rev. Lamsuanthang - Religion
 4. Rev. Stephen Chinzathang - Pastoralia
 5. Tv. Gouginsang - Church History
 6. Rev, Zamlianpau - Introduction to Christian Theology
4. 43rd General Assembly Presbyterian Church of India date 2-6 May, 2018 sung in Fiangpui, Haflong (Bieteram Synod) ah nei ahia, Palai 1300 in vaihawmna nei in ei Synod apat in 31 delegates kipang thei hi. Rev. Stephen Chinzathang Jr. Secretary ding in telching ahi. 44th General Assembly Ribhoi Synod in zintung ding hi.
5. Pasian hoina leh mapuina muongkawm in Zou Presbyterian Women Fellowship (ZPWF) te panlahna toh ang tung ding June 15, 2018 chiengin Presbyterian Church Thingkangphai ah a 6vei thumkhawmna nei ding uhi. Amaute i Nam, i Gam khuom leh bante ahi uhi.

Thumna items:

- 1) Mimal kilat siengthouna leh kipah thugenna.
- 2) ZPWF makai tute a din thumvai
- 3) ZPYF makaitute a din thumvai
- 4) Ita, inau siemzilte a din thumvai.
- 5) Tuunnu liimbel a TAGA te leh a enkawltute adin thumvai
- 6) I gam, i Nam leh Hattuum chinte dihtatna toh ang kilamtha theina din thumvai.
- 7) UZO puipa leh a Cabinet pite din thumvai.

- 8) Outside Manipur Delhi, Shillong, Chennai, Bangaluru leh USA tan a i Hattuum dingkhiete leh a enkawltu Upa leh Pastorte a din thumvai.
- 9) Zou khosun a hausate a din thumvai.
6. **Lungdampina:** Pasion in Ani siengthoute thumna hing dawng in tukum class X leh XII Board a exam pete i khanglaite lah a lawchinna ang piehte ziehin angpetu Mangpa kung ah thupina sangpen pekawm in lungdam thu igen uhi. Khum bang ahilai in a lawsam tampi zong aum chi theipi ahia, amaute adin puohsiemna leh thatha lahna ang hi theisem nading in alawsamte a din zong thumsah vaui.
7. Lamka May 17 Manipur Governor deina bang in Ph. Bhavananda Sharma a under Secretary (DP) Govt. of manipur in zan nitah in IAS mi 25 te transfer & Posting a order suoh ah Joint Secretary MOBC & SC semlel Pi Mannuamching IAS in Deputy Commisioner (DC) Pherzawl tu ding. Ama i lungdampi mama uhi. Tuaban ah i Khristian Tangkou deisahtu leh Patron member zong ahi.
8. 14th ZPCS Session R/No. 42 na bang in Presbytery teng a Upa telthate Synod in orientation (Training) pieh ding a lemsah ahibang in Upa teltha list Synod ah akinthei lam a submit ding un Presbytery chinte theisah ihi uhi.
9. **Presbytery vaihawmna** thupieh dungzui leh Zoutang Presbytery thaneina bang in Hattuum kemtu Upa teel na aum a, Result tam anei a bang ahi.

Min	Hattuum	Hina	District	Presbytery
1. Pa Khamzakam	Maukot	Elected	Singngat District	ZTP
2. Pa Khamkhanthang	Suohzahau	Elected	Singngat District	ZTP
3. Pa Thangneipau	Hiangtam	Elected	Tuivai District	ZTP

.....

NANG GUOLZAWLNA HIIN

(Gen. 13:1-3)

Khristian thukizahna Feb. 2018 issue apat.

Thupatna: Guolzawl hi ut huoi mama ahi. Genthap huoi seng ahi hinanleh, guolzawl na hina ding in eilam kai a PHUUT aum hi. Guolzawl na mutah leh guolzawl na mutahlou um hi. Guolzawl na hitheina ding in Condition um ana hi a, Genesis bung 12 sung a Abraham hatna apat i en ding uhi. Guolzawl na hiding - Guolzawl na mu ding zong ide i sahthu igen masa hi.

1. Nuasie ngamna: Abraham in Pasian hatna a zathei sese hi. Pasian in Abraham a han tuomse se chi thei zong abang hi. Abraham in Pasian hatna azah thei leh a zah hun bang ngaituo tham ching hi. Abraham pienna pa, Milim bawl a Pasien loup i pasien ahi chia mite sol a nehsui ahi akichi hi. Abraham in dihsa theilou nuam zong sa theilou, tuaban ah milim bie in kun ahi uhi. Abraham in Pasian hing Jehovah Pasien hing um ding ahi chi gingta tinten hi. Tamte zieh in Pasian hatna azathei sese hi chi ngaituo ding ahi. Pasien in Abraham bawl ding a gen a anuasie ding Pasien gamchiem Kanan gam zuon akipat khiet ding chi ahi. Sil 3 (thum) anuasie ngam leh sil 6 (guh) a guolzawl

a um ding Pasien apat thuchiem mungal hi. Abraham in tuateng anuasie ngam a, akipankhe ngam a, Kanan gam zuon in apeita hi. Guolzawl na tanna ding in nuasie ngamna poimaw hi. Pasien deilou kampau, umdan, nasep ichite i nuasie ngam poimaw hi. Ahoilam/Pasian deilam Pasien thuman ama ngaisahna manoh a kalsuon ngai ahi.

2. Kikhen khiet ngamna: Gualzawl na tanna ding in kikhenkhiet ngamna poimaw hi. Abraham in apaneu tapa mi minthang Lot akikhenkhietpi ngam hi. Tahsa dan a ngainat huoi leh kikhen theilou hinanleh uh guolzawl na hina ding in Abraham in Lot akikhenkhietpi poimaw hi. Lot ahileh khovel mi mama mai hi. Abraham pen

Pasian gingta mi ahi. Abraham in Lot toh kikhenkhiet ngeingei poimawsa in gam mun adei ateelsah masa hi. Tuachi'n Lot in a deina laitah Sodom phaizang ateelta a, Abraham toh ahing kikhenta uhi. Guolzawlna tanna dingin kikhenkhietpi ngamna poimaw hi. Khovel toh kichimat a kikhen khie zouloupi bang chi in GUOLZAWL na hi thei mah diei? Khovel toh kikhenkhie phot in len Pasian gam delmasa in. Tuachiin guolzawlna natang theipan ding hi. Abraham in Pasian gamchiem Kanan gam bawngnoi leh khuaizu luonna gam zuona ang pei zel lai in Sekem ah Pasian a dingin MAITAM hingdaw hi. Pasian a ding a maitam bawl ngailou, silpieh pengai khollou nahileh pephal inlen, Pasian a dingin maitam bawlngam inlen, tuachin guolzawlna nahi thei ding hi. Khovel toh kikhen khiet ngamna, huoihamna, sumdeisengna, dihloutah a mukhohsahlouna, hazatna, kisahtheina chite bang khovel thupina ahia, khumbangte toh kikhenkhiet ngam ngai ahi. Tuabang nahileh Abraham bang in guolzawlna nahithei ding a

it mama Lot pen Abraham in akikhenpih ngam hi chi ngaisun vengveng inlen guolzawl na hi ding kisa inlen, kipankhie in.

3. Piehkhiet ngamna: Abraham in a tapa neisun Isak, Pasian a dingin a pekhe ngam hi. Pasian a ding pephal inla, pengam inla, tuachin guolzawlna nahithei ding hi. Mi tate lawching uh chi nathei a, “Tate” lawchinna dia nu-le-pate’n bang chi bang a panla uh e!chileh a panlah dan uh ngaituo tham ching ding hi. Nang tate, lawchinna dingin bang chibang in pan nala a ... chi ngaisun kia in, bangma sep leh bawl panlahna neiloupi a bangchiin nang tate alawching ding ua achi bang ngaituo vengveng ding ahi. Tuama bang a guolzawlna hidingin panlahna nasepna poimaw hi. Pasian adia ginna thuchiem, sawm-a-khat piehna leh piehdan ah midangte awlmawna nasep a pan lahdan, na bawl dan, na lungsim puohdan ngaisun in. Guolzawl leh mutaah nahi nai mah? Mutheite a ding mutheiloute a ding hitaven ahi hitaleh zong piehkhiet ngamna, nasep tha leh zung Pasian a ding a phalngamna, tampen guolzawlna

hina ding ahi. Guolzawl na hina
dingin eilam pang ah phut aum
chi thei a bangma bawlkhieth/
sepkhieth neiloupi guolzawl nahi
ding a kikoi hithei mawhlou
ding ahi chi thei vaui. Tuaziehin
guolzawl na hina ding in piekhiet
ngam na poimaw mama hi.

Thumkhum sin: Guolzawl na
hina ding in Abraham bang a
Pasian hatna zathei ding hinkhuo

poimaw hi. Nuasie ngamna,
kikhenkhieth ngamna, taisan a
delngamna poimaw hi. Tuaban
ah piekhiet ngamna, midangte
awlmohna, hepina nei apoimaw
hi. Tua ding a panla a, sem a
zuite guolzawl na hithei dingte
ahi uhi. Khumbang ding in kisa in,
Mangpa'n ahing guolzawl dinga,
tuachin guolzawl na nahithei
ding hi. Simtute Mangpa'n hing
guolzawl hen!

NA UMDAN LEH KHRIST KHANTANHOI HING KITUOHSAH POUMA PHOT UN (Phil. 1:27)

Ruth Messenger Jan-Feb. 2018 issue apat

I gam ua Gospel khovah hinglut nung kum 100 avalta a chi uhi. Hinanleh i umdan uh Khrist Khantanhoei toh kituoh thei mama lou bangzieh ahi diei? Tangthu pha igam ua ang lut tunglai in pi leh pute ginna toh ana kibulphu uhi. Tulai Khristiante ahileh ginna toh hilou in sakhuo toh iki bulphu uhi chipen apiengkhemasa sa Khristian sakhuo a um himai, ginna pen kigen kha nontalou. Pasian thupen sakhuo a nei tho mai ding hilou in ginna toh saan ding ahi. Abraham in Pasian a gingta a khum ginna khu dihtatna in a simsa hi (Gal. 3:6; Jak. 2:23). A hiang grep gui a aum sih leh agathei sih chi ahi. Sakhuo hilou in ginna toh kibulphu lei DIHTATNA in hing zui mai ding ahi. I Khristian na uh ginna toh kipan kha non talou. Khristian sakhuo a i um nung milim bete sakhuo umla hilou hai a bang e ginna va chi chi kul non tuon amah? chi hilei kilawm koipou Pasian tapa gingta in kumtawn hinna anei Pasian in Vannei a it sengseng a, tuachiin atapa tangkhat

neisun ahing pie hi. Koipou Ama gingta a amanthai lou a kumtawn hinna anei na dingin khum ginna toh iki bulphu lou zieh ua igam ua DIHTATNA himhim um nonlou hi. Mi dihtat thumna in sil thupitah a bawl leng hi. Elija zong eima bang a pienken nei mihing sapsap ahi. Guozut louna din a thum a tuachin kumthum leh akim guo azu non sih hi. Ei khangah zong mi siengthoute ginna tah toh a thum mite thumna in sil thupitah a bawl leng hi. Eite thumna in bangma sil thupitah a sepkhiet gen ding um mongmong lou. I dihtat zoulou deu ziehma uh ahi diei maw? Khelna lam a shita, dihtatna lam a ihintheina dingun Khrist inla a thuoh zouta ngal a, dihtatna in Nam a tawisang i chi chi a eilawi tawisang um malah a niemkhieh deudeu hilou ima? Aban isim zel leh khelna zalahna ahi chi nalai hi. I Nam pumpi ua, zalah gawpta zong hilou khu Pasian apat ahisih mi koizong Khrist a aumleh silsiemtha ahing hi. Silluite a beisiengta ngai un ahingthata. I hinkhuo ah kihenna (change) aum ngai hive aw Unaute Dihtatna pen ngainep thei guol hisih ve aw

Jesun na dihtat un Pharisaite leh laigiel mite dihtatna a khupkhel sihleh Vangam ah nalut vawt sih ding lut zenzen na chisim e? Kei leh Belam khentu ding Jesu ma hive aw. Ei utdan dan a Vangam lutsawm mawh pen bailam sih leh kilawm Pharisaite leh laigiel mite maw, midangte toh kiteedin amau hoi akisa ua, midangte bangma a mulou. Kalkhata nivei anngawl, sawtpipi thumna nei, mi solna in. Agen lampang siem mama uh la zui tuon lou uhi. Puohgih mi guon uh ama unla pawnuom teu lou zel “Rabbi” chia hat bang a ut sese uh. Vangam lampi daltu in umzing nalai uh Amau la lut sawm mongmong lou! Sawm-a-khat pie uh ahivang a dihtatna, hepina leh gin umna chite himhim nahsahlou uh. Sunglam hilou in polam kilatdan ngaikhohzaw uhi. Tamte sang a i dihtatna uh ahoizawh ding ahi. Vangam lutna ut leh i tahsa damtheilou zieh a mi neh leh dawn bang zong ne a dawn theilou a kideh tinten ihi uh maw? Min singpi hum hing pe uleh zong ken singpi hum dawntheilou chia dawn ut kilkellou same tuituoh ahisih leh malta me hing nehpi sawm uleh zong ken athah

netheilou chizel mai, chi al nasan nelou a kideh thei mama ihi uh maw? I hagau damtheina dingin Khrist Khantanhoi toh kituoh loute bangzahvei topsan in i um ngam uoi le? Khristian kahi a tamte pen Khristiante umdan ding toh kituohlou ahi chi a bangdia topsan ngam lou ihi uoi le! Tahsa lam toh kisai a iki deh tinten na in kum bangzat idam kum a susau zou diei le! Tahsa lam i ngaipoimaw sang a thupi zaw in hagau lam hinkhuo ding ngaipoimaw zong a kum a gen hilou, tangtawn a bei ngailou ding hinkhuo hilou maw? Tahsa lam a

sotpi dam nuom in, hagau lam ah pen shibai khohsalou hilou ima? Tua ahiman in bangchin iumdan leh Khrist Khantanhoi toh hing kituoh ma diai mah? Ginna toh kibulphu pouma lei tua i ginna uh, Pasian in i dihtatna um hing simсах khamaw lou ding hi. Ginna ah na um na uh e? Umlou nouma kien chien un “Ginna toh kibulphu pouma phot lei, dihtatna a kilamtha pen hasa nawn lou ding a, khum dihtatna a iki lamtha zou chiengin i umdan uleh Khrist Khantanhoi hing kituoh tading hi. Amen.

DELHI HATTUOM VENA REPORT

- Rev. Awnkhankhup,
Moderator, ZPCS

Delhi ZPC in a kum 7 chinna uh Pasian kung a nuomthu genna Programme anei hun ua kava pan thei man in hamphathuoi kasa a, Pasian hoina ka mute tambang in kang giel hi.

I Synod lamkai ten Air Asia Lenna nuomtah in tun leh kuon a hing peisah ua, tahsa leh hagau ah hampha ka kisa mama hi. May 10, 2018 Ningani nitahlam dah 4 vel in Delhi International Airport ka tung

a, tuanah Khanglai lamkaiten a hing na lamdawn pai ua, Munirka a Pastor Quarter hing zotpi in, tuamun ah Hattuum lamkai nu leh pa te ban ah khanglai tampi ten siemtah in ahing na vaitun ua, thatawl bang a dam huoihuoi mai

hi. Alelam khat ah, Pastor Quarter luotu Rev. Khamminlian, a nun a muolliemsan zieh a Lamka lam a hing pawt khieh kal ahiman in, thawmhau huoi na khat a um a, a kimlou a kibang den hi.

Delhi a um sung a kizahdan tangpi tambang ahi:

1. Khopi sung hing vahpi uh:

Ka tunni zing May 11, (Ningani) leh May 14 (Seppatni) te pen mun tuomtuom phah na ding in ana guonggal masa ua, Car nuomtah mai khat in nitum tum in a hing vahpi zel ua, ka zin masah lai te a heima sungkhat pha ngai mawngmawnglou kahi man in, kei a ding in sil zousie a tha veve ahiden mai a, mit taihuoi kasa mama hi.

Muslim leengte innsang lam **Qutab Minar**, sakho zousie in thumna mun a anei theina mun uh **Lotus Temple**, Pu Gandhi te kihalna mun **Rajghat**, Yamuna lui kam a Muslim leengte kulbaang ki-im (Km 2.4 a sau) **Red Fort**, Second World War (Japan gaal) a gamdang mi sepai galhang sisate thei zingna ding a kibawl **India Gate**, kum 2015-2016 lai a Manipur singtang mite a ding

a hoilou Bill 3 kibawlte zieh a Delhi a imi leh sa umte kiphin (Protest) na mun **Jantar Mantar** mun te ban ah India phuolpi vaihawmna mun Parliament House kichite bang a sung a sem Pu Khakhai Zou deisahna zieh in kava lut thei uhi. Pension kuon a tambang experience hing neisah Pasian leh a Hattuumte ziehin Pasian min ka phat sawnsawn hi.

Tambang a khopi sung mun tuomtuom totna hun a thupi kasah mama ahileh - Hattuumte kiphalna leh a kipumpiehna uh ahi. Vah-lena Car ban ah, neh leh dawn bangkim kichingtah in a bawl jel uhi. Thamlou in, sawtpi nua a zong muthei zel ding chi in limlah hoitah in ahing bawlpieh uhi. A silphalna uleh ami deisahna phatthamching kasa hi.

2. A hing zintun dan uh:

Deisahna lientah toh neh leh dawn, tunna giehnate ban ah sil pieh donna lam ah kava hampha mama a, mi lien leh mi poimawtahte bang in ahing zintun ding a kituthaw ua, ka hun nei in a dai zou lou zieh a ka phah khah manlou hing deisah tampi zong a um nalai hi. Elisha zintuntu

meithainu guolzawlpa Pasion in a tamsem a ama nasem thei dingin guolzawl hen chi ka thumna ahi. Mimal leh Hattuumte deisahna ka dondan ka ngaituo chiengin, Pension advance a hingha uh bangin ka gel a, lunghel huoi pou kasa a, kipahna in zong ka dim zel hi. Mi'n Pasion a it chieng ua, a nasemtu chingla pente zong itkhawm uh ahidan ahing muchien sah a, hun peisa a khosah hasatnate zieh a genthei kisahate bang manghil thei dingdan in a hing um thei zel hi.

3. Thu leh laa a kizahna lam:

May 12 kiginni sunnua lam in Pu Hauliankap te inn ah PWF te thu leh la a kithuo khawmna hun ah Pasion thugenna hun manphatah kava nei thei a, lungkimhuoi kasa mama hi. Nupite kipieh zouna leh panlahna ten a hing chou mama hi. Nitahlam in Pastor Quarter lam a kisuon pheikia in, Hattuum sung LCC, PWF leh PYF lamkaite lah a '**Hattuum sung kilamkaina**' chi thupi zang in Paper ka present a, dohna leh dawnna hunte ka nei uhi. Lamkai te a kihong ua, a phattuompi ngei ding uh kagingta hi. Zan dah 8:30 in peikhawmten annkuong

ki immkhawm a, nuom mama hi.

A sawngthumna dingin zan dah 9:30 in **Murnika Prayer Cell** te toh hun kizangkhawm kia a, khanglai lamdeu ahiman un, Bible simkhawmna leh thumkhawmna hunte nei in, Pasion thutah genna zong kanei sawnsawn hi.

4. 7th Anniversary Programme:

May 13 Pasion ni nitah dah 5:30 in YMCA Auditorium ah tam hunpi pen guonggal ahia, thakhat pi a huipi in Delhi hing nuoi gawp hinapi in, tuabang khonuum lou pi nuoi ah, a nai agamla apat Hattuum mite ahing peikhawm ua, lamkai muon Pastor G.K. Samte, Pu Philip Thanglianmang leh Pu Khakhai Zou te ban ah midang hunkhop zong hing pangthei uhi. PWF, PYF, KNP te ban ah mimal in zong Pasion phatna la ngai tahtahte sa ua, ken zong Anniversary Message dan in Pasion thutah genna kava neithe i a, lungkim huoi kasa mama hi. Kikhop zou in peikhawmten Hattuumte bawl annkuong ki iimkhawm a, khat-le-khat kimutuona leh kithei tuona manpha tah a ahia, amanpha mama mai hi.

Tambang a Pasian mi siengthoute toh kithuo khawmna va nei zou, May 15 zingkal baitah in Upa Lunminthang in Airport ah ahing thah (drop) a, nualam mit neikawmkawm in Delhi Hattuumte bye, bye chi in ka hing kilekia ta mai hi. Tambang

hamphatna hing bawlsah Delhi Hattuumte ban ah tuabang a kizangthei ding a hing sawl i Synod lamkaite tung ah lungdamthu ka gen hi. Thupina tan ding um zousie Mangpa'n tang taken.

NUMEI HOI A PASAL A DING A AMANGLUKHU

Proverb 12:4

- *Upa Khupsuankham*

Thumapui: Mangpa Pasian in numei asiemna san khu pasal amatang a khosah ding pen hoilou asah jieh in Adam akimutdu laitah in anahgute lah a khat la in akithuopi (helper) ding a numei ana siem ahibou hi (Gen. 2:18,21). Pasian in Adam nahgu akipat a ana siem khelkhel na khu mihing a dingin lutang leh kengphaang kikal a valaikim (centre) ahia, tua khu numei in akal val a gamtat a, a ngiemseng a zong a gamtat a, vai asai ding adeilou ziehin Adam nahgu apat in numei ana siem hi.

Numei khu nuomtatlou ding, uongtah a gamtatlou ding, muonhuoi ding,

ettontah a umding leh **ITNA** hau ding china ahia, Numei khu Nu apat a lahkhiat ahi (Nu-325) Nu ingchi chiengin - Nu hita, utdandan a umthei nonlou, Pasian leh a pasal zatat ding leh it na a kivon ding ahi.

I tang teelna sung ah thulien leh poimaw tahmai 2 aki khumkhawm a, tua khu:

i) Numei hoi apasal a dia Manglukhu

ahi.

ii) Numei sie khu apasal a ding a gu-le-tang muotsahtu ahi. I thu uh ahoilampang a kilah hoi semna ding in aselam gen masa vai, tua khu Numei sie a pasal a ding a gu-le-tang muotna; ahisihleh gu-le-tang muotsahtu ahidan gen masah ahoi ding hi.

1. Zumhuoi bawlno, achipen apasal

gu-le-tang sumuotnu, numei senu china ahia, banglam sil a zumna adieimah a theiha hi. Ahin i Laisiengthou thu un zumna a angaite khu; Zuouna, thasietsna, kiletsahna, dangnalna, nu-le-pa (innpite) zong zatatlouna, kihauna chite haw (tehkahpi ding in thupil 10:5; 13:5, 18:13, 19:20, 25:8 te en in. Thei giaguo napia kitheimaw bawl (kilepsan) lungsim sienthou louna chite zong ahuop a (I Kor. 4:14; 15:34; II Kor. 2). Paul in hantoh thu agenna ah zumhuoinate zaulou ding in a hantoh a, Khrist min jal a gimna leh athuoh dingte uh, bang tobang hitananleh zong (Rom 1:16; II Kor. 7:44; II Tim. 1:18,12). I Kor. 11:17 leh Thupil 14:30na dungzui in pasal pen Pasian lim suun ahia, alungsim khai uleh anasep un Pasian minphatna ahisihleh minsiet theina apuo hi. Numei pen Pasal thupina ahi ziehin alungsim khaisiemna leh siemna leh siemlouna ah leh nasep hoi leh hoilou ah apasal adia minphat theina ahisih leh minsiet theina a kilang ding a-um gige ahi. Lungsim hoi khu tahsa hinna ahia, hinanlezong enna (thangsietna) khu gute a dingin muotna ahi (Thupilte 14:3).

I tangtel uh ‘Zumhuoi’ ama china umzie themkhat muthei a umte khu:

- 1) A pasal khel a pasal dang eenna.
- 2) Pasal zabawllou a ngainep, nuoinet sawmna lungsim.
- 3) A umloulou eeng a innsung subuoi, akhelkhel a kampau leh dehna kamteng suote.
- 4) A pasal asuhzalat (zum) khah ding khuollou a a innsung ua vaihawm zatzat mai (apasal toh thuneina, hatna, bawltheina leh akibang hileh kilawm bang a thugen zungzung a gentampen hi sawm a afelpen leh adihpen bang a kampau gigte bang).

I Kor. 11:7 na dungzui a apasal pen Pasian loupina ahi a, a jii (numei) pen pasal loupina (suloupi) ahitah chiengin bang e chia numei (ji) in a pasal angapthaw, simmaw, a challenge a ahileh a pasal tung ah zumhuoina bawl hiva’n pasal sumuolphou, miten a pasal ngaineusah, mungiemsah ahia, tuakhu a pasal adia vangtana kipatna leh guol-le-pai lah a thulut lana ahitah zieh in tuakhu agu-atang a dia muotna/sumuottu ahing hithei tahtah hi. Nang nupinu aw na gamtat leh na kamsuo in na pasal a sumindai kha ama? Amel sesah kha amah? Miten na pasal aselam a amutheina dingin na umkha amah? Tuabang sil pouma khu na pasal gu-le-taang nasuhmuotna ahi.

Thupil 12:4 a **Zumhuoi bawlnu** apasal **sumuolphou** nu ahisihleh a pasal suminse nu china ahimai hi. Numei in anu leh apa anuasie a adamsung alimbel dia azot a pasal a it zing a bangkim a ahuom gige ding Pa pen asuhzum tah a ahileh a pasal khuol leh a innsung khuol hitalou in a innsung bitna thuguh umteng thezattu china hiva'n in, apasal pasal hina agutna (athupina) migiitna teng bangmalou suotu china ahia, tualaitah khu apasal adia agu-le-tangte sumuotna ichi khu ahing hita hi. Tambang numei in a innsung ah silhoi bangma a pawlut sih a, thuhoi zong a salam ah akaai fing a, apasal unau lam poupou amu chieng in a mit khup va'n, ama unau lamte amu chiengin atate kung ah, napute, na pite chi sepsop va'n, a innsung ah anuate thawl mama va-un, apasal unaute din lah Aah-kot kikhah abang ding hi. A pasal kholai ah mawsiet in gense va'n, pasalte nasep khat pouma toh ama pasal tekawi van, kou apa lah chiviel van- koima dohlou in zong a pasal in a innsung a numei na aseptam jel pouleh kipahthu agen sang in khatvei (akai chieng a) aseph khelleh phunsan in hankhum van, ka jinu aw ... chi hileh kilawm bang in. Tuabang sil umdante apasal pen a innvengte leh a khuo-aveng, alawm, aguolte mitnu ah achiil a fit 5 phasapen tu

in fit 3, fit, 2 in miten musuhvan, tuakhu MUOTNA kipatna ahia, atheng suhsuh ahita a, aneu suhsuhta hi. Ajinu in apasal gutna teng kholai ah azua mangta hi, dahuoi!

2. Numei hoi in a innsung ah guolzawlina apuohlutdan enkia vai: Sildang igen masang in i Bible un, Numei hoi achite bang tobang e, chi enphot va-ui (Thupil 31:10-31) sung ah kilangte khu:

- 1) A innsung khuol (apasal innsung)
- 2) A pasal adia kipie, a innpite anu leh apa bang a bawl.
- 3) A tate ittina toh kem zing.
- 4) Pasian lungsietna a innsung a puohlut tum tinten.

Numei gilouten anua uh akhuol uh/ angaisa uh ichi zouta hi. Ahivang in numei hoiten vang a pasal toh a innsuonna leh innsung pen luphumjen in akhuol uh a, ama lam uh (sumkuong in lithuuhlam akhuot bang in) akhuot tinten hi. Numei hoi ichite khu a lungsim uh hoi ahia, mite sietna ding gellou mite lungsimsie a zong povatehlou sietna khu hoina a thuh sawm nu ahizaw uhi. Mite phun leh ham leh gitlou sil a demlou a, asie zong thudih kilah hun um naven chia ngahmai mihing ahi ua, ahoite ma ahoi ahimai hi.

Numei hoi kichi khu Pasion zauthei, a innsung khuol, a pasal mite mai a amaiphat theina ding khuol gige, apasal minsietsah sang a tawisang tupna nei gigte, apasal suse ngailou humzou/panpizoute, a innpite zua ngailou, a innsung ding a silhoi silpha, apilhuoi, afel huoi, innsung ah bang ka polut thei diei mah chia ngaituo gige. Numei hoi in a innsung a ding a guolzawl na a puohlut dan athupi mama a, gensiem ahasa zaw bawn hi. Numei hoi in a lungsim hoi apat in;

- A tate lungsim hoi leh thudih ahil a, thudih toh amakaai a, atate hinkhuo a ding lungsim hoi baa ‘Gou’ aguon hi.
- Atate zahna a zuouthu agen ngaisih a, a pasal zong atate muna ah atomsan sih a, azabawl a, atehpi atehpute khu ama nu-le-pa bang in akem a, a pasal sanggamte zong amanu sanggam bangbang in akem hi.
- Nehthei, dawnthei, sil-le-ten thei sil a zong ama ading sang in apasal, atate, atehpi/atehpute, apasal sanggamte a ding a ngaisah masa a, atui, a-aalte zong a innsungmite a pemasa a, anehtang, asiltang apie hi.
- Numei hoi in adihna atu tentun sih a, mawlou/kehlouna a ngaw

khah ulezong thangpaina a gellou in thudih kilah hun ding ngah in atou hi.

- Numei hoi in alungsim hoi apat in nna hoi asem a, tua nahoi aseppen in a uplouna ah zong thu agen a, (Heb. 11:4). Tuanu in a innkawte amaitaisah hi.

Numei hoi alungsim hoi a pat in thangsietna bei in nna asep ziehin a theilou kal in midang adia silhoi leh phatuom zong abawlkha a, tuabang a abawlhoinaten a innsung mite atawisang a, apasal atawisang masa pen hi. Tuakhu ka pasal tawisang vangchia a vabawl ahi khol sih a, tupmawng a bawl zong vahi tuomlou hi. Tualaitah khu ahoina ahi. Tupmawng a bawl ding hitaleh 2 vei kan silhoi abawlzou sih ding a, alungsim hoi apat a **Gouhoi** a suokhiet china ahi. Tuakhu apasal in aminphatlaw a, a innsung ding a goukhol ahia, guolzawl na ani ani, ahun chin a atat china ahizaw hi.

“Khuna numei hoinu khu Lienpu ji hi e” kichi taleh Lienpu aminphata a, tuakhu Lienpu’ Manglukhu ahita hi. “Khum nu khu alungsim se mama a, koi ji e?” kichitahleh miten “Penglam ji hi ei” chitale uh, “Apasalsal toh kibang e!” kichivan, Penglam a ding in aminphatna adiei leh? Penglam jinun a innsung ah

guolzawlina lam leh akilawm eileh? Kilawmlou hi. Tuakhu pasal gu-le-tang sumuottu ahi.

Numei hoi leh gin-um in a innsung a silhoi aphuhlut laisie, silpha leh goumanpha leh pilna thu apuhlut laisie a innsung adia Guolzawlina pawlut ahi hi. Asum-apai vateh guoljawlina ahisih a, thuhoi, gin-umna, tahpanna, dihna, felna chite khu asum-apai sangma a thupizaw guoljawlina ahia, Pasian thu hil leh damsung leh shinua lampi hoi hil ahia, gou thupi mama ahi. Thuhoi, silhoi, van/neitah hoi ama jal a a innsung in atante khu numei hoi in a innsung aguojawlina a puohlutte ahi.

Numei hoi khu a pasal lungtang in amuongngam hi (Thupil 31:11). Tuabangte khu (Thupil 31:12-31) sung ah akilang hi. Tualeh numei pil in a inn alam a, numei maw in a inn aphel ahi, chi zong imu hi (14:1). A innsung khuol pouma a innlam ahia, a innsung gensie a, khuol vatehlou pouma inn phel ahi uhi. A innsung khuol numei in a innsung

hoina ding a adei a, sietna lut ding a vengbit in a zausah a, kihauna, kingah, kimawsietna chite innsung a aumlouna ding angaituo a, neh ding mula, silla, teengla chite a umlouna ding in a lungsim ah akhuolpha gige hi. Atawp ah a sietsang in aman athuoh ngapzaw hi. Tuakhu belampu hoi, a belamte a ding a ahinna pie ahi (John 10:11).

A innphel kichiten a innsung a sietna alutding khawh asasih a, thasietna leh tangsietna leh pil kisahnate a um jiehin numei hoi in a innsung ading in;

- 1) Kipahna, lungkimna, thadamna leh lam-etna atun hi.
- 2) Minphatna, vangphatna, deisahna leh kilemna atun hi.
- 3) Lungsim siengthou apolut a, thuhoi akuo a, Pasian hoina apolut hi.

Simtute zousie Mangpa'n guoljawl hen!

PRESBYTERIAN HATTUOM

- Rev. Zamlianpau

France gam a um a nu leh pa zong Roman Catholic Hattuum a um, Hattuum sung a kizilsah leh kipuidan dihloute bawlhthana/bawlhoisom dei zie a Roman Catholic Hattuum apat taikhie, 1509 AD a pieng 1533 AD a Hattuum kichi zopna neilou a um, John Calvin, ahinna humbit na ding in Switzerland a tailut hi. Ama mukhiet dan in Hattuum vaihawmna siempu khat mai or mimal lamkai khat mai puoh ding hilou in, tuolsung Hattuum Upate vaihawmna nuoi a kivaipuo ding ahi a chi hi. A zilsahna/Thuhilnate France Holland, General leh Scotland gam tanpha in hingtung pai hi. Kum 1560 in Scotland Hattuum kichi hing ding pai hi. Tam hun a kipan Presbyterian Hattuum hing khang hat mama in kum 1643-1649 sung in Westminster Association khawmpite a “Westmister Confession of Faith” English leh America gam a Presbyterian Hattuum dan bu khat bawlkhiat hing hita hi.

Kum 1684 in Francis Makemio in America gam a Maryland ah Rohoboth Presbyterian Hattuum hing ding khie in America gam a Presbyterian Hattuum musuotu chia thei in a um hi. Tunin America leh tumlam gamte mai hilouin leitung pumpi a tam Hattuum a khang hat mama a alien mama hi.

Presbyterian Hattuum a pawl tuomtuom, kizilsahna tuomtuom tamtah a umta a, America, Europe leh Suolam gam a tam Hattuumte THUGIN zilsah leh kihilna kibahlouna tampi a um a, tuazieh in tam pen ahi Presbyteriante kizilsahna leh thugin chi a tomkim tah a gen aha hi. Bangteng hitananleh John Calvin kizilsahna khun “HUNDAMNA” kizilsahna khu chituom deu hi. Tualeh Presbyterian Hattuum thugin khu hundamna chi lou a dang teng Evangelical thugin toh kibang hi.

1. Laisiengthou
2. Pasian
3. Setan/Diabol
4. Mihing
5. Khelna
6. Hattuum
7. Hun nunung ding thu
8. Nitante (Thupiete) etc.

HUNDAMNA: Presbyterian Hattuum a hundamna “Thugin” kizilsahna khu John Calvin kizilsahna a kibulphu ahi. John Calvin in Hundamna thugin thupi 5 (five) in a tunkhom a, tuo thupi te khu laimal kipatna zila hichin lahtom anei hi.

THULIP

- T = Total depravity
- U = Unconditional election
- L = Limited Atoement
- I = Irresistible grace leh
- P = Perseverance of Saints.

Tam khu ahi a thuhil.

1. Total Depravity (Siet dimdemna)

Mihing pienken a lam chinteng a kisékawp dindem ahi. Tuaziehin silhoi mawngmawng abolthei sih a, Pasian lam zong ama thu/deitelna in anga thei sih hi. Mihing Hagau lam ah tat lehnate leh khelnate a shi ahizieh in lunghei in Jesu Khrist ginna in asang theisih a, hundam zong ahitheih sih ding. Tam khu a (Total Depravity/ siet dimmena) kichi khu.

2. Unconditional Election (Mihing lam a nget umlou a telna)

Pasian bangkim tunga thunei, tantawn a thuneina sangpen

tami koiman sel leh niel guollou ahi. Aman mihingte a ut pou leh a ut bangbang in a hundam a, mihing lam a nget leh pan na ding umlou in hundamna abwl hi, mi khenkhat a hundam a, khenkhat a paikan, autte hundam leh a utloute hundamlou na thuneitu sangpen ahina, bangkim ama thuthu ahina agen hi.

3. Limited Atonement (Khel kithoina in phatawp nei)

Khrist shina ami sehkholtel/ teltuomte mai a ding ahi. Pasian in a sehtuom lou mite a dignin hundamna a um sih. Jesu shina leh khelna thoina khu teltuomte mai a ding a kikoi ahi. Tam bang sahtuom loute/telloute abanpha zou zel a, amau a dingin a kiching zou sih china toyh kibang ahi.

4. Irresetible Grace (Nial guollou hepina)

Pasian in hundam ding mi a teltuoma, tua mite utin utsih leh uh Pasian hepina aniel thei sih uhi. Hundam in a um thouthou ding uhi. Amau thahatna leh mihing hatna in anielzou sih uhi. Hundamna zong khu loup leng kumpi Pasian sih ahi leh ashima sangin hundam ahi thouthou ding.

5. Perseverance of the Saints (Misiengthoute kepbitha)

Koipou Jesu Khrist hundamna
tang zousie Pasianin a
sehtuom/teltuom te kepbitha
uhi. Hagau siengthou in luo in

thahatna kitanpi in solna leh
khelna douzou a khiel lou in
ashitan dong in kembit ahiding
a, khelna leh shina tung a
guolzou in van a pei ding uhi.

Youth Corner:

MIMAL A DING A LAWCHINNA LEH GAM A DINGA LAWCHINNA:

WORLD CUP GALDOTNA.

World Cup 2018 June 14 nitah a kipan ta ding pen galdotna a kigen tam mama khat ahileh “Tutung beh in Messi in Argentina a dingin WORLD CUP lahipi taleh maw” chi ahi. Argentina in World Cup alah masatna uh asawtta khop mai. 1978 leh 1986 a alah uh pen ahipep a, tunai deu a 1990 (Champion West German) extra time minute 113 in Mario Gotze Goal khum) in final kai uhi. Ken zong kachi nuom sim mai hi. Messi tuin la kum 30 ahita. Kum 4nna ah khun upata mama ding hi. Argentina in Player nei hoi mama nonlou uh Messi aumlou leh ordinary ahi tamai ua, South American Championship ah Chile team penalty shoot out ah zou lou nalai ua, International team apat top ana sawmta uhi. Agueo pen tukum English Premier league Manchester City Champion hina ding a abawl hoipen ahia, a gam a dingin bang ahing chi diei..? UEFA Champions league ah Chelseate 3-0 a azawna uh khu kum upat nua in a ngah zou ki umsih van, akhenten en sausau thouva. Tam match MESSI asiem tungtuong ahimai hi. Goal 2 ama’n lamdang tahin goal keeper minthang COURTOIS kalkal ngen ah apeh lut a, Goal khum toh kibanga manpha khat DEMBELE peh lut dinga a pass pen ahi. Tambang khop in a gam a din khatvei beh hing bawl hoi mai leh chi ARGENTINA fans zousien chi ngei va uh Foot ball siem mama ngal ama mimal a lawching leh minthang mama a gam a ding Cup lahipi khalou tampi a umta hi a, ahat laitah a gam a ding a World Cup ana lahpate lawchin na pen kuitung leh bukim ahipeh hi. Nidanglai ana mithang “PELE” in agam Brazilte World Cup thumvei zen ana lah pi a (1958-1962

leh 1970) ah tambang a gam a dinga world cup thumvei lahpi aum sih. Argentina hatlai a minthangpen khovel theiphah a zong siempen mi tamtah ana ngaisang DIEGO MARADONA ahia, ama Captian hina in kum 1986 in Champion ana la uhi. Germany ana zou ua, 1990 kum in amautegegel mama in final ana peh ua, tam kum ah Germany teamte pen hoiseng taluo “Well oiled machine” ana chi hiel uhi. Lothar Mathaus Captain hina Cup ahing domtamai ua, khumni a Maradona mittui luonpen mitamtah mitha tam nalai ding hi. Maradona Khang kichai nua in Argentina in guoljawlna tangkha nonlou, tutung beh in awle chilou thei ahisih uhi. Ken zong Germany ma kapanpi nalai ngal in. A senior Player te uleh Junior te European Cup late hing pangkhawm/kigawm ding hoitaluo ding uhia, mimal a minthang tungtuong umsuh nan le uh a team uh ahoi mama hi. Thomas Muller, Mesut Ozil, Manuel Neuer, Gomez te upa deuta nanleh tha a fit tahtah Werner, Leroyssane, Golze Stegen aum uhi. Tunia igen nuompen ahileh ama ua ding a zong lawchinna, agam ua ding a zong lawchinna tunpi zoute khu THUPINA sem ahi uhi. Germanye player minthang Becken baurer in player hina in Cup alahpia, Manager hina zong alahpi hi. England ten player minthang tahtah ana nei ma nan uleh 1966 chau in World Cup ana la ua, tam nah player minthang Bobby Charlton leh a lawite khu England gam in manghil theisih va uh. Kum 52 nua bang chih chieng Cup ang domkia tadi uai maw...? Harry Kane leh a lawite bangtan ang tung di uai maw...? Christiana RONALDO in European Champion alahpi a, tutung bangtan ang tung ding uai maw? Ama mimal leh Club a ding a bawl hoi mama te MESSI, RONALDO, NEYMAR, CAVANI, LEWANDOWSKI, HARRY KANE, HAZARD, amau gam chiet in kineppi taha galdot ding uhi. Tambang guola tunia igen nuompen ahileh eima mimal a lawching hingala, Pasian manggam nasepna ding a phattuomna neilou hikhah ding a zauhuoi hi. Nangma mimal ah halaw tampi nei, innten khosah khangtou hulhul, nei leh lam a khang huthut hingal in Pasian gam a dinga bangma sepkhiet neilou nahileh na LAWCHINNA pen nang a ding bep hivan, PASIAN a ding leh na ‘U’ leh ‘Nau’ te adin phattuomna neilou ding nahi-Chief Editor.

Muanna Ahsi April 2018 issue apat lahsawn.

Suunna

Ordain suunna: PHAMSA UPA M. KAMKHANPAU

Bio-data

1. Min----- : M. Kamkhanpau
2. Pamin ----- : (L) Sienzapau
3. Numin----- : L) Luanzanieng
4. Pienkum ----- : 01-03-1951
5. Pienna khuo ----- : Paldai
6. Koppi min ----- : Nu Chiinkhoneel
7. Kiten kum ----- : 26-07-1977
8. Kitenna ----- : Pindan
9. Gawmtu----- : (L) Rev. Ginchinzam
10. Pienthani----- : 15-06-1967
11. Baptisma tanni----- : 13-04-1964
12. Tangsahtu----- : Rev. Thangkhogin
13. Tanna khuo----- : Sajik Tampak
14. Laisiemna ----- : Class - VIII
15. Nehsuina----- : Lou nasem
16. Taneizat----- : 11 Pasal 5 leh Numei 6
17. Ordination tanni ----- : 13th December 2009
18. Amun/ Presbytery Session 43rd Session MEP, Saiboh
19. Ordain tu Pastor ---- : Rev. Lamsuanthang, Moderator.
20. Ordainna mun----- : Presbyterian Church, Saiboh
21. Hina mun ----- : Presbyterian Church, P. Salem.



Tanchin tomkim: Kum 1951 in Paldai khuo ah ka pieng a, kum 1958 in Sajik Tampak ka tung kia hi. Kum 1963 in Sugnu St. Joshep School ah kakai hi. Kum 1967 October ha apat paldai Sector VVF in kapang hi. 1968 in Shimla training ka nei hi. 1984 June in Ex-Servicement in Manipur Riffle ah ka lut kia hi. 1990 apat Hattuom lam a hat leh hatlou thu umlou in Pasion gam nasep na'n hun ka zang hi. Dated 05th May 2009 apat in UZO Kana Block ah President in 2013 tan ka puo hi.

Akizahnate: Dated 1st January 1984 apat in P. Salem Hattuum ah Local Secretary ana puo a, Dated 27th December 1990 apat Secretary hina kana pokia hi. kum 1998 in District Secretary hina kana puo hi. 2014 kum in district chairman kana puo hi. Tami kum mama in Manipur Eastern Presbytery (MEP) Secretary ma kana puo hi. Dated 6th Oct. 2013 in MEP Moderator mawpuohna kala hi.

Thukhumsin: Ama pen Gam leh Nam laina mi ahia, hunsawtkuom damlou a etkawl ahi nua in dated 14th May 2018 nitah lang nai 1:30pm vel in a it angaiteng nuasie in thupina gam ahing zotsanta hi. Ama iit leh i suun thu tam i Khristian Tangkou deithaw huoitah tungton in ipuong uhi. **Aladei teel:** Hundamna dongkot kihong e. Latha No. 95 Mangpa'n anuasie azi, atate leh a hattuum etkawlte umpi in hamuon zing taken!

Ordain Suunna: PHAMSA UPA L. KAMGIN:

Kum 1930 in Singngat Sub-Division a um Buhsau khuo ah apieng hi. Kum 1938 in Buhsau apat Singngat ah apem hi. Kum 1945 in pawnpi Mongken khuo ah Japan Sepoy te a gitlou zieh a gaaltai a, 1946 in Muallum Camp ah a pem a, 1947 in Singngat khopi ah a pumlut a khumnah school akai a, 1948 in Old Churachandpur Mission Compound ah Mission support a chawm in lai a sim a, 1953 kum in Class -VI apassed hi. Kum 1954-1969 tan kum 15 sung Indian Army ah pang in a Pension hi. A school kai hun sung Army English first class leh Hindi first class in Pass hi. Kum 1942 in Khristian a hing kipie in, 1965 in Baptisma tang hi. 1965 in a ji ittah toh kiteng in tapa-4 leh tanu-3 nei hi.



Pasian nna asepn: Kum 1970-1975 sung Manipur Young Christian Association (MYCA) ah Health Care Minister in ana pang hi. Kum 1971-1992 sung aumna Hattuum Presbyterian Church Singngat ah Sunday School Sangsyte nna sem hi. Kum 1976-1984 sung teng

Manipur Gam Presbytery Senior leh Junior Secretary in ana pang hi. Kum 1985-1992 sung Manipur Gam Presbytery ah Moderator nna ana sem hi. Kum 1989 MGP Moderator ahi kum in Manipur Eastern Presbytery a Salem khuo Hattuum Biehinn ahong hi. Kum 1979 MGP Senior Secretary ahi sung in Rev. Haukham toh Mollhangphai Presbytery Mata lambulane ah ava hong uhi. 1979 ma in MYCA kum 25 chinna Silver Jubilee lopna ah Choir Competetion ama kaihuoina toh Tuivai District in Prize sang uhi. Kum 1979 apat Missionary board of Manipur ah Chairman in pang hi. Khum hun lai in unau Burmate kung ah Pasian nasepna in Bible Labu hawm din thawn uhi. Kum 1981-1988 sung Tuivai district (MGP) ah Secretary mawpuohna ana tu hi. 1975-1977 (kumni) ama chiarman hina in Pastoral prayer of Fellowship (PPF) Rev. Hauzalien pen Secretary ahia, Kailamnuoi a Presbyterian Hattuumte a tuon kimvel uhi. Kum 1990-1995 sung teng Singngat District Chairman ana puo hi. Kum 1989 in Tuivai District Suongphu Singngat khuo a hong hi. Tuachi'n aum na khuo Hattuum Biehinn PUCCA Building bawlina din Building Committee Chairman mawpuohna leh Pastor Quarter sangtah nei in Pasian panpina'n amawpuohna zou in tutan chiengin Pasian phat in Biehinn ah ahun tamzawte mang den hi. Pasian min phat in umtahren.

Suunpina leh thuohpina: Tami khovel i inn det hilou a ikhuolzinna gam bep a hina toh dated 29th April 2018 niin THUPINA GAM ahing zotsan tahi. Ama iit thu leh i suun thu tam i Khristian Tangkou deithaw huoitah in i puong uhi. Mangpa'n ama leh a innsung mite hamuon in umpi zingta hen!

ZPW F COLUMN

April 27 to 23 May 2018 sung a Tunnu Limbel panpina pete:

- | | |
|--|-----------|
| 1. Pa Kamkhogin, Central Church | Rs. 100 |
| 2. Nu Vunggouniang, T.Talnuam | Rs. 100 |
| 3. Nu Niangpi w/o Hausuanthang
MDC, Zomi Colony | Rs. 2,000 |

4. Nu Dimneiching, Central Church	Rs. 1,000
5. Mrs. Chinmuanching, German	Rs. 5,000
6. Mangsiantung, Thingkangphai Kitenna kipahna silpieh	Rs. 1,000
7. Pa Khupchinthang, Tuibuang	Rs. 500
8. Upa Goumang, Central Church	Rs. 200
9. PWF Imphal Anntang tang	Rs. 3,250
10. Nu Chingneikim, Central Church	Rs. 500
11. Nu Nousuanching, Central Church	Rs. 500
12. Tv. George Suanlianlal, Muollum Birthday kipahna silpieh Naupangte meman dinga apieh.	Rs. 1,000
13. Nu Mannianching, Lailamveng	Rs. 500
14. Pa Jacob Suankhanlian, Lailamveng	Rs. 500
15. Nu Chingngaikim w/o Upa M. Dongzalam, Zomi Colony Surf bomlien - 6	
16. PWF V. Bethel Anntang Kg- 20	
17. Nu Chinglamniang w/o Khupkhansiam Pahmual	
i). Gotuoi hou-1kg	
ii). Naahtang khil-4	
iii). Annphui-Mekhat	
18. Tv. Hangpu Zomi Colony in naupangte a Birthday kipahna silpieh a piehte:	
i). Methai (Sweet) Pocket khat	
ii). Pencil box-5	
iii). Kids story book	
19. P/P M. Thangboi Zou in Mother's Day ni a Naupangte ave hun a silpiehte:	
i). Pencil bom khat	
ii). Methai (Peanut sweet) bom khat	
<i>Petu zousie Mangpa'n hing guolzawl zing taken.</i>	
<i>Adihloute Office a suhdih theizing ahi.</i>	

.....

PATRON MEMBER-TE

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkthoang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Retd. Tualzachin	22. Rev. (Rtd.) H. Nengzaton	23. Rev. Awnkhankhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkthohawng
29. Upa Khaichinmang	30. Rev. Stephen Chinzathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzanuam	35. Pu T. Gouzadou	36. Upa Liensuonkap
37. Pi Zelkhochiin	38. Pi Hatkhanvung	39. (L) Pi Ngaihoiching	40. Pi Mankhannieng
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakhup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichiin	68. Pu T. Khupchinthang
69. Upa T. Kaizalam	70. Pu Paul Henkholal	71. (L) Pu Soikham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhozam
77. Upa (L) Chinpu	78. Pu Zamkhanthang	79. Pu Chinglen	80. Miss Chinhaunieng
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkhohling
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Upa (L) Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taihul	104. Pu Kamkhanpau
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. Rev. (L) Mangsuanthang	115. (L) Pu Lamchinhou	116. Upa Pauchinlel
117. Nu Kimneihei	118. Upa Kamgenpau	119. Nh. Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munluo	134. Pu Sianzakhai	135. Upa Thangginsuan	

LIFE MEMBER-TE

01. Upa (L) T. Khupkenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhannieng	06. Pi Ngainuom
07. Pu Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	18. Upa P. Doukholun

Fundelivered

Please return to:

The Editor

KHRIŦIAN TANGKOU
ZPCS Office, Zomi Colony
Churachandpur - 795 128
P.O. Box - 48, Manipur, India
Synod Office Telephone No. (03874) 235105
Website: zousynod.org | email:info@zousynod.org
zpcs@rediffmail.com/zousynod05@gmail.com

7a,
